



始



家學存稿

11-474



梁雲存稿

大正
10 7.14
内交

母 芳子
長男 功

佐田二女 若森
七男 克己 妻 里子

佐田二男 洋
澤妻 鏡子

武長男 捷
長男 温

克己長女 蕪子

佐田三男 暮秋

小山 轍太郎

克己三女 勝子
三男 武

克己二女 愛子
温二男 胖
佐田家年

佐田四女 澄子
六男 晋
長女 女世(家年妻)

佐田三女 光子

七男 忠
佐田長女 郁子

引

家嚴小山轍太郎。號巢雲。弘化二年七月生於
三河國碧海郡小山村。壯歲脫鄉。勤于王事。王
政維新之後。出爲秋官。其經歷七十自述之詩。
略盡之。今茲大正十年辛酉齡躋七十七。邦俗
所謂喜壽也。乃付其平生所作之詩稿於劄。爲
爲記念。且以頌親故云爾。

大正十年七月

男

温 謹 識

不與尋常春色同。洞天三月送東風。桃花時節
滿山白。回首連呼睡放翁。
蠟履嵩村渡上移。寒香脉々趁筇隨。溪頭不但
佳人笑。隔水峰巒齊染眉。
溪山一白渺無窮。盡日閒遊與夢同。夜靜風香
人不寢。滿簾疎影月朦朧。

雨中看桃花

睡起高樓倚曲欄。天々姿態滿仙壇。花間煙雨

鶯聲濕。枝上輕風蝶夢寒。紫魄紅魂三日恨。嬌
歌艷吹一宵歡。隔簾女伴能相戲。其葉萋々嫁
後看。

珠光

臺子真行式殆成。主賓制禮授名卿。東山從此
茶煙熾。散作神州鼎沸聲。

利休

清風傳得愈精工。從此無人說紹公。能使武夫

知禮法。孫通以後是千翁。

瑞巖寺途上作

欲訪僧房避俗埃。聽泉失路上崔嵬。寒茅開徑
山狼去。霜樹擁山天狗來。巖石都如閒鶴立。峯
巒恰似亂鴻回。神靈却導真佳境。到處雲烟脚
下隤。

遊嵐峽

渡月橋頭秋已深。輕舟一棹泝清潯。逍遙峯上

誰家子。唱出山行杜牧吟。

唱出山行杜牧吟。霜楓紅映白雲岑。風光不讓
寒山徑。又抵停車當日心。

平薩州

君不見源義家。征衣春暖詠落花。又不見杉謙
信。過鴈秋清賦遠陣。兵家隔世有詞雄。一氣呵
成不用工。我愛薩州平太守。古都尋花嘆嗟久。
多情一夕春風前。花陰露臥也夙緣。名士名花

得奇遇。主客風流萬古傳。海邊空埋稜々骨。永
留佳什名不沒。滋賀咏花才藻優。孰與勿來關
花能州月。

春雨偶成

濛々春雨猶未收。微風吹送河邊調。憶昔青年
在都下。流連數日鳧川樓。東山携妓擬安石。有
時獨運帷幄籌。功成臺閣留圖畫。五湖煙水尊
自由。當日意氣今何在。老去百事付休々。只有

風光似往昔。鳥啼花笑春自悠。

消夏雜吟

何處蒼天熱氣收。風々雨々颯如秋。芙蕖十葉
池中裂。茉莉三莖盆裏稠。蟹眼放聲茶室靜。蝸
涎留字草門幽。晚來興味誰知否。醇酒一尊魚
一頭。

迅雷慣耳夢魂歸。九萬鵬程事已非。一陣清風
斷煩惱。數珠白雨悟禪機。盆池水赤金魚躍。田

圃聲青白鷺飛。忽地雲晴天亦靜。碧琅玕外澹
斜暉。

牽牛花

我愛牽牛花。日新又日新。紅碧與紫白。一々看
其真。

阿漕浦

阿漕浦上雨如絲。垂柳和煙顰翠眉。何處樓臺
歌一曲。唱來平次罩魚時。

夏日雜詠

清風萬斛未全貧。老屋三間了淨因。天地與吾
唯有酒。江山覓友竟無人。半生空感莊周夢。滿
面常污瘦亮塵。壁上試題歸去字。雲煙蓬勃繞
吟身。

百事拋來心自平。古今成敗付盃觥。蟲趨熱火
終招死。魚退急流能養生。老不老間工媚語。官
非官處見真情。誰知顏子簞瓢樂。却勝青雲不

朽名。

歲晚夜坐漫成次松本滄海韻

青史閒繙燈一枝。崢嶸歲月欲窮時。兵離卽墨
開生面。牛襲燕營剩死皮。興敗閱來書照眼。光
陰流盡雪盈髭。梅花獨笑窮冬裏。軒下忽橫冰
玉姿。

夢遊月瀨

十里梅溪跨鶴遊。春風吹曉望悠悠。暗香浮處
留殘月。疎影斜邊臨碧流。塔勢抽煙知有寺。人
聲隔渡似招舟。醒來欲記探幽迹。一壑一丘冥
裡搜。

遊大洗

雲濤嚙岸恠巖欹。大洗祠前洗客思。銚子口開
吞海面。金花山淡掃蛾眉。鳥聲喧處潮聲急。帆
影懸邊日影遲。風死灣頭萬松翠。老鱗如畫落
清卮。

山寺晚鐘

浴罷樓前喚酒醪。前山蕭寺送鐘聲。鐘聲撞出
黃昏月。無限風光慰客情。

八月十四日遊于大洗此日大風雨也

暗澹海洋天不開。北風獵々送狂雷。雲從米利
堅州涌。雨捲豐蘆原國來。鯨鱷噴濤天柱折。蛟
龍擲玉地維摧。女媧呼起千年下。鍊石補天援
此災。

冬日拜結城神君祠

旋轉乾坤氣未磨。歸帆隔颺恨如何。滿天飛雪
阿漕浦。北雁相呼渡白波。

拜湊川神社

一世傑然公之雄。萬世巍然公之忠。湊川之死
豈徒爾。扶持大義興士風。後五百年逢明治。朝
廷追贈正一位。嗚呼碑畔人作群。忠臣龜鑑留
青史。君不見老賊鬼飢枯骨寒。偶像失首墓受

鞭。等持院落荒白日暗。只有飢鴉噪暮天。

播州道中

青松映水影婆娑。奈此眼前奇景何。月白須磨
明石浦。煙殘淡海舞兒波。鼓聲不起穩鷗夢。笛
響何邊和權歌。身在古祠祠下立。唯看島外片
帆過。

雪

曙色玲瓏不日光。凍雲散盡望茫茫。飛花春淺

翻梅塢。落絮天寒滿柳塘。天地也無容漢帝。江
山暫是屬秦皇。此君獨倚蕭牆臥。宛似劉邦住
碭芒。

春宵卽事

好是春宵釀雨天。林巒如夢碧欄前。一簾弦月
淡於水。花影模糊白似煙。

春遊雜詩

懶逐春光伍綺羅。江邊閒步且吟哦。黃鶯轉處

紅塵少。粉蝶飛邊清興多。一角山雲知雨滯。滿川柳影見風過。晚來初悟歸途遠。好抱新蟾臥酒窩。

曉起書所見

宿雲一帶後山遮。點滴聲收寒益加。窗外枯林懸落月。滿枝殘雨凍如花。

春日雜感

滿江春色自清和。獨愧花光照鬢皤。身似一龕

彌勒佛。心同三界六天魔。紙鳶颺々因風舉。籠鳥啾々負日歌。容裔靜凭亞字檻。碧空雲破漏嫦娥。

春江漁父圖

好是春江披短蓑。釣竿也掛酒瓢過。扁舟一棹煙波興。偏向桃花源上多。

河原村途上

春深輕絮化萍浮。幾隊香魚趁小流。知是漁夫

垂釣處。長竿時動柳陰洲。

蝶使蜂媒導醉翁。黃金搖蕩菜花風。阿誰健筆
幽詩補。小笠浮沈麥浪中。

青松一帶隔黃花。河曲山阿三兩家。昨夜秧田
春雨漲。案山子倒委泥沙。

除夕祭窮神作

君不見破廟祭詩張船山。神女一燈照清魂。又
不見旅館夢妻查初白。荒鷄數聲驚落魄。我亦

天涯梗萍人。歲云暮矣北海濱。幸無鴛鴦欠偶
怨。奈其鵲鴿難盡歡。追往憶來坐燈前。欲眠不
眠獨茫然。初白船山仙去矣。名將名詩留姓氏。
我生從來不學書。徒將迎春加馬齒。卅年不遇
知己人。胯下空嘆淮陰市。忽然有聲在上天。喚
曰護汝爰有年。跪坐厚禮問來歷。答曰我神州
窮神。窮達有命汝莫恨。不義富貴似浮雲。神語
貫耳消心火。不羨麟閣肖像寫。急向神棚遂福

神。慙懃迎神遷上坐。安得追儼豆萬槽。欲養扶桑千里馬。

牧野芝石氏招飲分斗酒雙柑字爲韻

得酒字

有友有友有良友。閒居山陰芝石叟。豈啻一斗百篇才。揮毫落紙龍蛇走。草廬近市不染塵。門有喬松庭五柳。閒聞點滴爲琴音。何須沒絃勞高手。轍也官遊已十年。鼠牙雀角慣耳久。不向

文壇爭抗衡。甘受春宵金谷酒。

竹窓待月

靜居煎茗且閒吟。蟹眼生邊涼氣深。風外婆婆殊有趣。月中瀟灑見虛心。時呼破硯裁新句。又對疎燈彈古琴。客是嫦娥朋是竹。小窓幽致價千金。

弓濱

濤聲鞞々兩厓潮。夾路亂松吼迅飈。此景人間

不曾識。大仙山下大天橋。

看梅

來宿仙。衾夢未安。起推窗戶望前巒。暗香動處
東風白。綽約冰姿帶月看。

玉造村

一江流水月黃昏。載筆來敲山下門。地爲溫泉
春到早。玉村先返玉梅魂。

登大仙山

萬峯飛舞走西東。一峯巍然聳半空。此山從古
絕人跡。往々神仙度巖從。狂夫好事來探祕。捫
葛踏蘿攀高嵩。頂上初知天下小。三道山河在
兩瞳。君不見平原凸處蛙鼻岡。豐公膽略服毛
公。討賊創霸神算定。乍翻馬首向上邦。又不見
海上峻峯船上山。名公忠肝挫賊鋒。開國承家
親筮吉。遙奉鸞輿還九重。嗚呼今日此何世。西
洋列國事橫縱。就中北連海水處。露西亞州最

梟雄名豈出世已往昔。山林豈莫潛臥龍。願爲
帝國建籌策。雄飛地球五洲中。

雪

東皇游戲玉塵霏。坐見乾坤白四圍。屋後有聲
知竹裂。窓前生影訝花飛。重茵呼嫂時猶在。三
顧訪賢人又稀。記取空明將日暮。踈鐘一杵落
寒扉。

鶴湖亭上作用古澤介堂韻

山色湖光雨未乾。恰似佳人出浴新。笑倚欄干
對明鏡。三十二相寫得真。湖底溫泉塵可澡。即
是蓬萊小仙島。山氏築閣助天工。漢皇之臺何
足道。此身落魄寄寰區。不學彈琴馬相如。借問
山靈吾老日。分與翠眉一半無。

餘暉樓上分樓名爲韻得樓字

杜宇聲中話舊遊。水雲望斷坐欄頭。一簾斜日
微涼動。人在久松山下樓。

米城客舍送中田古月自今市之任津

山次韻

共話離愁謝客莊。津山此去似遐荒。蘇黃書信
常無絕。管鮑心交久不忘。兩地分看一輪月。滿
頭難奈萬莖霜。人情難免隴還蜀。記否官途更
渺茫。

別宴賦詩々始成。又尋棋敵鷺烏爭。雪泥鴻向
天邊去。幽谷鶯遷喬木啼。盤嶽聳當征馬首。錦

湖深似故人情。錢君有此奇山水。雲自送迎舟
自橫。

讀史雜感

天道非耶又是耶。左遷自古正人多。君脫御衣
察凍餒。臣捧御衣泣恩波。御衣盛德高千古。奈
此君臣冷遇何。讀到千里飛梅章。不覺掩卷獨
長嗟。忽報都下東風惡。吹散寒梅幾樹花。

湯島偶作

種石城頭樹如煙。馬山々下波連天。滿眼風光
易牽感。孤客徂徊憶當年。豐公智略吉公膽。一
轉兵鋒一醉眠。無事閒人愧二傑。獨撫髀肉浴
溫泉。

春初大雪走筆賦此

天公好事爲玉戲。奇寒刺肌不得睡。推窓咫尺
雪正酣。三日飛絮滿天地。呵杖探梅到溪邊。只
有清香暗撲鼻。君不見瑞王查留斯。君不見佛

帝拿破崙。懸軍長驅入魯土。不計天候惱三軍。
進歟無敵退無路。將卒凍餒軍不振。兩雄前後
同其轍。國弊民疲終亡身。獨笑魯人慣用術。偶
然奏功依大雪。若使拿破無驕心。彼得遺業金
殿缺。嗚呼近時雙鷺侮隣邦。巧取鷄王弄掌中。
不知東方真男子。嘗膽臥薪養英鋒。驚天動地
破彼睡。北辰星下馳錢曉。青帝挽回陽春日。雪
兮雪兮奈東風。

病中雜感

病叟檢衣驚酒痕。自今廢飲養吟魂。依山寺院鐘魚靜。近水樓臺絲竹喧。夢裏尋詩追杜牧。燈前撫枕思桓溫。此生到底難成佛。一任心猿意馬奔。

萱島雜詠

盤岳山頭雲作堆。轟々隱々吼奔雷。黑風颯爾飄濤去。白雨滂沱捲地來。石蟹沙邊成隊走。鷗

鴟天外亂群哀。須臾天霽涼風足。忽地邯鄲一夢回。

御來屋途上

一繩鴈影挂斜陽。渺々水天秋色長。隱島何邊看不見。名和祠畔桂花香。

御來屋客舍

海樓酒醒惱吟情。僅去米城還客程。欲雨欲晴天一日。不寒不暖夜三更。鴈聲遙伴櫓聲去。燐

集
卷
第
一
集
在
稱
火時追漁火生。隔壁女兒相對哭。颶風去歲失家兄。

題畫

六花滿天地。獵夫遠近迷。鷺鷥看不辨。聲白斷橋西。

後鳥羽上皇舊趾

蚤雨蠻風鎖。鴛灣龍舟漂泊幾難艱。亂蛙煩耳勝田水。天狗蔽明焚火山。空送光陰刀百鍊。纔

凌風雨屋三間。乾坤正氣終磅礴。八道山河帝政還。

米城留別

錦海之秋盤嶽春。嘯花弄月慰吟身。無心山水不堪別。何況有情多少人。

歸田卽事

我本吟花嘯月人。誤爲官吏世餘春。故園三逕存松菊。猶是先生未了因。

蒲郡

半島廻環恰似湖。烟波縹緲繞吾居。老夫不覓
名兼利。軒下垂綸閒釣魚。

地臨白水傍青山。吾樂未離仁智間。本為無家
却多幸。吟筇停處占仙寰。

答但見醒所

分手猶留眼。秋風感別杯。東籬采菊去。北雁送
書來。君斂扶搖翼。吾甘蒹落材。吟心元皓潔。不

雜一塵埃。

蒲郡海水浴雜吟

南北東西客。同遊海角村。小兒爭拾貝。老叟互
傾樽。鶻影消三谷。鹽烟散片原。倚欄微避酒。始
識月臨軒。

日々為何事。風流生僻加。一詩三水浴。斗酒半
甌茶。風死鷗尋食。潮生蟹訪家。晚來閒試釣。喜
動上竿鯊。

斷儀閒覓句。心與水雲濃。絕嶺畱殘月。疎林漏
曉鐘。遠樓茫似屨。高樹鬱如龍。老去難浮海。俳
徊羨赤松。

秋於今日立。海上動西風。影爽松梢鶴。聲涼草
裏蟲。火雲頽嶺上。曉月漾波中。氣力逾清快。浴
潮殊有功。

片名散策

出門纔一里。幽靜適詩情。木落郊彌潤。荷枯水

益明。山高過鳥道。溪曲激泉聲。回首天方暗。暮
雲林樾橫。

師崎卽事

趁涼登海閣。山色半雲煙。御嶽壓蓮嶽。漁船先
賈船。鳶飛天欲霽。魚躍水生漣。前渚彈琴客。潮
來座屢遷。

巖島元旦

神女祠前淑氣回。靈鴉報曉瑞雲開。玻璃窗外

舉頭望。麋鹿悠悠作隊來。

鶴鵝亭雜吟

萬樹葱蘢別有天。三間茅屋一窓圓。信峯濃嶺
淡披畫。鳥語松聲清入絃。雨後煎茶醒陸羽。月
前呼酒醉青蓮。小山初作小山主。世外優遊是
宿緣。

聞海戰之捷喜而作

夜來風雨逞號吼。怒濤澎湃旅順口。乘暗來侵

一隻船。巧旋祕計晦迹走。天明雨霽黑雲開。旭
旗翻處旭光催。我第三艦挑戰鬪。敵陷術中突
進來。烟濛々中艨艟見。露將狼狽轉舳回。轟然
爆發水底雷。白浪衝天艦體摧。君不見義軍所
向無勁敵。黃海制權歸我國。偉哉我皇之稜威。
大哉我將之功績。

府相消暑

夢醒詩思動。散策府相濱。前渚幾行蟹。後磯一

釣人。德風唯偃草。沛雨復歌幽。回首三山聳。嶄然隔俗塵。

登高雄山

平安城西愛宕東。高雄山谷多霜楓。清瀧川清布素練。潺湲一道綿繡中。君不見文覺師。煩惱頓悟色即空。又不見清磨公。拆伏妖僧建大功。兩公何緣同舊跡。停杖憑吊梵王宮。只有溪山剩霜葉。恰似袈裟鮮血紅。行到清公埋骨處。丁

々蒼々聳古松。笙鏞相和護古墳。千歲猶傳公清風。落日蒼茫天欲暮。萬楓嶺上月一弓。

有馬

早晨探勝去。鼓瀑挂千尋。初日漸升嶺。宿禽已起林。鬪龍黃石略。和瑟赤松心。清世無謀士。笑談李白吟。

蒲郡雜吟

懸崖之下水之濱。萬斛清風屋健身。山角吹升

集
卷
存
和
一輪月。湯中倒映數竿筠。揚々士氣振南極。赫々皇威合北鄰。浴後閒披新帔見。獨描空像喚杯頻。

御影新居雜吟

處女塚東滄海頭。閑居卜得望悠悠。夕陽紅葉栖雲寺。新月金波近水樓。避暑消寒無二地。名山勝水在茲州。如今老叟爲何事。雨則醉眠晴出遊。

杖錢今日亦何爲。不顧水村翻酒旗。心廣體胖溫故學。世清地靜覓新詩。一王寺古楓衰早。六甲山高月上遲。造化妙工吾樂足。笑他別業費多資。

世棄先生何亦悲。江山只好托生涯。晚秋始訪猿丸墓。朝霧重來柿本祠。空聽須磨千鳥噪。遙看淡島片帆移。愧吾無語驚千歲。停杖感吟前哲詞。

箕面山

路盡溪窮到水隈。霜楓千樹夕陽催。奇巖怪石
雲將掩。怯見燭龍吹燄來。

蟹

沫口無名論。反目不真瞋。橫行無腸子。化得幾
多人。

蛙

欲立難獨立。折腰只貪餌。有餌爲官鳴。餌盡私

鼓吹

夜坐偶成

東窓燭盡未天明。節近黃梅雨滿城。謝豹啼邊
仙兔遁。竹孫長處塾龍驚。參禪數月終無用。酌
酒三杯却有情。我愛陶公真隱逸。樂夫天命忘
衰榮。

偶感

半歲中原雨又風。茗華黃矣漢宮空。牂羊泣血

拋墳首。留得星光護罽中。

岡本觀梅

背山面海萬梅開。香滿乾坤氣快哉。依約羅浮
殘夢在。林中逐々美人來。

春夜風雨卽事

狂風暴雨繞樓臺。只恐花魂暗裏摧。樹底樹頭
春遠近。無端又過五更來。

春日遊野寺

鶯誦法華梭綠紅。妙音導我梵王宮。佛前一醉
空天地。酒味亦兼禪味同。

春日散策

湖光山色破新愁。十里長隄任杖遊。雲漏鐘聲
知有寺。煙遮醉眼未看樓。微風草店飛來燕。細
雨蒲帆懶去鷗。身在莊生春夢裏。過花徐步近
花休。

閑居雜吟

壯年歎髀肉。幾度欲乘桴。老去詩三昧。晚來酒一壺。月輝空卽色。琴曲有還無。獨笑青雲士。何知此靜娛。

鷹取看桃

山家落々紫雲遮。恰似蜃樓帶彩霞。老叟呼杯
桃下坐。兒孫鬪草不看花。

登摩耶山

曙色依微月影斜。峯巒處々噪寒鴉。履霜何事

人來早。驚起山僧急煮茶。

白雲深鎖此仙鄉。誰信當年是戰場。回首塵寰
看不見。交々黃鳥集春桑。

詠史

叱咤風雲下自天。三方合擊鼓闐然。赤旗無影
白旗閃。一谷城中賀捷年。

簸却滄溟九萬鵬。不知羽翼附青蠅。婚姻爲主
弟兄遠。原上脊令無所憑。

秋日閑居雜吟

昨夜坐禪榻。今朝弄釣竿。此翁無檢束。來往佛
仙間。真如人不識。栗笑水邊山。

誰言人蓋棺。而後有定論。湯武大姦人。古今皆
眼暈。掩卷獨長歎。窓前柿子忿。

世清誰逐鹿。山谷擅幽情。牆僵雲護屋。燈盡月
浮觥。吟床獨臥夜。時聽呦々鳴。

秋晚偶感

古渡爭呼未出航。回頭滿地已昏黃。草蟲月暗
人聲換。野馬秋高骨力强。摩洛風雲空變變。四
川波浪只滂洋。臥龍鐵血今黃土。寂寞西東傀
儡場。

鳴門觀濤

阿山翔。淡山舞。兩峯對峙鳥張羽。中有海峽大
鳴門。勢撼地軸傾天柱。船頭何物響轟々。非雷
非電非風雨。疑是鼉爭鯨鬪處。萬兵水戰射萬

弩。熟視回潮浸乾坤。一來一去互吞吐。五大洲
中無此奇。白人黑奴來快觀。今後喋々休高談。
瑞西山水埃乃古。

處女冢

處女冢。乃在六甲之麓御影之里。美人昔被戀
兩夫。桃李爭妍春雨裏。海棠一枝竟不堪。名花
空落生田水。名花空落後幾年。在將戰敗過冢
前。擊鼓如雷矢如雨。爰喪其馬奈其鞭。君不見

太郎高家回轡救。直向千軍獨奮鬪。獻身獻馬
表丹心。血塗杯土麥自秀。行人灑淚空長歎。英
雄處女何因緣。高名高於六甲山。深情深於生
田川。

消夏雜吟

獨喜無門駐客車。蕭條環堵暑堪遮。早蛸向晚
吟槐樹。片雨催涼入藕花。流電光清螢過岸。蓄
音聲穩犬歸家。文明器物兩三種。卽是山中宰

相奢。

登六甲山

碧草萋々石徑微。節非炎暑客過稀。異花香向
眼前落。怪鳥聲從脚下飛。女到懸崖停小步。翁
攀絕壁脫重衣。忽看空裏樓臺現。雲作峯巒龍
欲歸。

同

再上高山坐翠微。仙凡難別意依稀。長鯨噴浪

南溟走。孤蝶吸花東里飛。紳士雲中鳴革鞜。佳
人風裏颭毛衣。疎鐘一杵黃昏冷。皆負赤松明
月歸。

同

甲峯如巢鷺。相對收羽翼。隔海雙鷺噪朔風。一
飛盍試強骨力。神功征新羅。埋甲此山巔。我來
仰神德。回首獨慨然。君不見北方大鵬乘風起。
將上南天九萬里。垂雲之下雛鳳翔。不知舌邊

藏鐵背。

春日偶成

塵埃升盡作青天。釀雨釀雲年又年。花有恩讐
開又落。春風能握一時權。

七十自述

欲將一死盡愚忠。壯歲脫鄉西復東。按劍手龜
高野雪。衝冠髮櫛白川風。維新漸列高官後。知
命先歸陋屋中。迎得古稀猶健在。兒孫繞膝喜

何窮。

早遠青雲未近仙。愛斯人境自由天。鼠牙雀角
往時夢。鶴算龜齡他日緣。月下徒追坡老醉。花
前豈止放翁顛。風流不盡詩還酒。琴讓喬松本
沒絃。

散策

梅花日暖綻雲煙。馥郁香通兜率天。曆日大寒
今日始。酒家疾首我嫣然。

過赤松圓心城址

老松深處獨長嗟。誰信後凋真勝花。朝奉錦旗
明節義。晚憑幕府計榮華。八幡林外秋風冷。七
曲溪頭落日斜。回首湊川山下路。臭芳只隔一
烟霞。

偶成

隙地種菜蔬。帶霜肥數寸。李侯十八食。穆父精
晶飯。寒厨日薦之。心清體亦健。

題瓢

不煩許叟耳。不潤顏子口。先生屢移居。汝未離
坐右。有酒學劉陶。無酒插花柳。歡娛無盡時。休
說空兼有。

下保津川

山坼朝暎射兩瞳。回頭噴沫畫丹虹。欲看奇景
忽經過。身在謫仙詩句中。

兩岸山楓漸飽霜。奔波織出蜀江裳。立田一曲

閒吟了。顧望美人天一方。
山躍樹飛忙送迎。詩思畫況未分明。女兒笑指
橫溪道。紅葉深邊轉老鶯。

登一王山

杖錢已散不沽醇。石徑尋秋到寶輪。滿目霜楓
皆醉色。林間只剩獨醒人。

登六甲山

探埋甲跡欲何題。行客稀時趁馬蹄。石佛有聲

飛霰路。烟虹遮眼亂雲溪。窮猿抱子登寒木。哀
雁呼朋落雪泥。憶起伯林飢虎嘯。危於累卵近
邦雞。

檜尾陵

老檜森々雲幾層。草蟲晝鳴秋氣澄。微臣來拜
不能去。空仰正平 天皇陵。憶昔 天皇受禪
日。天柱折矣地維缺。天傾北極不滿南。南山何
處營鳳闕。五色之石空粉碎。一鰲之足已枯骨。

集雲存稿
百川滔々無停時。陰雲堆裏白日沒。君不見物
換星移轉乾坤。皇威赫々四海振。三尺童子知
大義。大義分明豈人間。春櫻秋楓到處在。或表
赤心或倭魂。

畝傍山東北陵

誰信往年抔土荒。獨令志士斷心腸。天皇親
謁期將近。一點無塵大道長。

大神々社

君不見武甕雷。植劍立談定皇基。又不見事代
主。投竿來告避國土。爾來大己貴之尊。勇退遷
徙三諸山。專司幽事能布教。萬民崇拜大國魂。
嗚呼斯神去已遠。後世無人知根本。只說美人
著欄麻。三縈之餘留宮苑。

倉梯岡陵

不與豬頭醢逆臣。豐聰託佛作前因。倉梯陵上
秋風冷。遺恨千年泣鬼神。

螢池晚望

螢池春早無螢火。地近浪華多此花。新月影生
天已暮。亂星水底認橫斜。

江州途上

寒雨蕭々鎖古城。琵琶湖外幾程々。車窓回首
天將霽。粉傳比良雲際清。
粟津遙欲弔英雄。鐵路春寒落日風。勇婦去邊
雲雨過。當年恨在斷虹中。

悼亡

二十四番花交開。黃鶯睨晚花上來。鶯也底事
嬌喉咽。花也胡爲暗愁催。此時內子惱二豎。恰
若殘花遇風雨。倉刀扁匙竟無効。芳魂空去歸
黃土。回顧雙棲卅餘年。衣奔食走七處遷。漸卜
閒地種佳樹。連理枝摧獨悄然。柳絲萬縷如此
多。難綰人生未了緣。強扶男女弔新墓。墓面南
溟背武庫。清風遙從土州吹。六塵一掃北邙路。

曾聞妙齡在鄉時。開港鎖國紛如絲。竊助志士
盡王事。胸中感慨寄國詩。王政復古早二世。當
年辛苦有誰知。

赴臺灣船中作

萬里長航只利爭。船中誇說業新成。誰知老叟
一吟客。爲愛名山試此行。
攘夷激論滿區寰。彈雨砲煙驚馬關。回憶當年
感何極。船過壇浦夕陽間。

晨旭依微似月光。水煙遮眼海茫茫。本州南去
已三日。暑氣襲來天一方。

淡水港

榕樹青青斜日妍。西人古閣尙依然。甲螺出沒
知何處。極目煙濤憶往年。

海尾莊閒居雜吟

卜宅時期夏已深。懶栽蘭菊養幽心。秋庭雜草
長三尺。付與百蟲隨意吟。

疎鐘一杵忽持寺。款乃數聲生麥灘。夢醒茫然思往事。英人墓上月痕寒。

海閣蕭々十日霖。連松濕盡不彈琴。天公作意憐吟客。換得四川流水音。

曉鴉啼散脫孤衾。雲放殘蟾倒後岑。昨夜大風吹萬竅。老松臥地尙龍吟。

夢遊

幽谷人不識。寒梅臨水開。黃昏猿抱子。弄月枝

上來。清晨鳥喚侶。啄花林間回。我偶駕鵬翼。下界却悠哉。

我愛

我愛海棠艷。含露曉粧新。春眠猶未足。莫比醉太真。明皇幸巴蜀。不承一霑恩。芳魂阿誰許。轉使詩人顛。

題露根蘭

禹域雖亡正性存。國香自在滿乾坤。神州萬古

有芳土。可託所南清露根。

小病口占

春月朦朧生水湄。文窓寫出海棠枝。老來小病
吾何患。只患良宵酒力衰。
我亦蛇年是夙緣。維摩病室曲肱眠。夢魂空作
角弓影。出沒盃中親聖賢。

梅雨卽事

旭日三竿雲僅開。恰如珠玉在龍顛。須臾榴上

留紅去。隱躍濛々起雨來。

榴花枝上餓蟲爭。傍有蜘蛛張網迎。欲駐短筇
看得失。雨風吹散兩無情。

梅霖十日晝猶昏。老眼拋書臥草軒。也似鐵圍
山下地。火車來往數驚魂。

海尾莊卽事

海上風全死。閒鷗睡碧灣。豫知明日雨。依約總
州山。

題自畫蘭竹

絕代佳人幽谷花。不知何處托生涯。唯容君子
長爲佩。莫上金盆嫁富家。

數竿宜月又宜風。趣在嬋娟瀟灑中。只恨此君
仁術甚。蚊群日夜護林叢。

銷夏雜詠

老來甘獨臥。夏景與心同。門柳千絲綠。庭花百
日紅。卷簾山斂雨。移榻月生風。晚酌只尊聖。詩

情在此中。

方等般若瀑晚望

霜楓萬樹鎖仙關。一道奔流擘劍山。暮雨將晴
雲吐納。雙龍躍出碧溪間。

中禪寺途上

昨夜楓林過勁風。吟筇到處席紅絨。瀑聲鞞鞞
是天樂。身在華嚴法界中。

日光廟

雕貓呵護翠微宮。仰見日光高照東。一境將軍埋骨地。豈同疑塚老瞞雄。

關原

壬申亂後恨如何。還使東軍奏凱歌。滿野薇長無伯叔。喧傳牧野動干戈。

不破關趾

藤川水淺亂蛙鳴。不破關荒空有名。借問松間一痕月。古今照盡幾豪英。

御首陵

陵在黑血川之東

古杉蒼鬱鎖峻嶒。傳是弘文御首陵。白日失光天漠々。杜鵑空叫血川凝。

大谷吉隆墓

勝敗豫知臨戰場。幾回叛將挫鋒鋦。病軀空不委泥土。俠骨稜々萬古香。

金華山懷古

金岳巍然聳半空。古城移步弔英雄。兩體祝酒

魂吞恨。諸將歡聲氣吐虹。排佛壯心消宿霧。尊王大節返頽風。遊人不識興亡事。只說鶉舟操術工。

松島

翠鳳和鳴喚臥龍。甲鱗影動鏡中濃。輕舟載酒尋仙窟。八百八洲皆赤松。

大沼途上

養老飄然來異鄉。塵纓欲濯赴滄浪。夏天此地

無三伏。鈴薯青々小麥黃。

秋夜卽事

半聽蟲聲半雨聲。安眠難就若何情。孫兒臥榻太狼藉。幾度添衣到五更。

冬日閒居雜吟

岡野園東小草廬。春秋住倦況三餘。寒風吹落破窗月。霏雪映來殘几書。隴畝將凋諸葛菜。江湖未躍茫蠡魚。貧厨只有邨筒貯。一醉陶然萬

事除。

岡野觀梅

一坂往來人若蟻。溪頭雪滿無高士。清香脈脈
晚風前。片月澹邊迷鶴子。

謝人贈梅花

美人曾不住瑤臺。却嫁寒家得。天妒奇緣
君記取。夜深明月破窗來。

鹽原

峯飛溪走客心驚。車馬聲和流水聲。只有悠悠
白雲在。紅楓深處沒還生。

絕壁纔開細徑通。棧橋半朽苦吟翁。欲呼孤鶴

雲霄上。龍化瀑來從碧空。龍化瀑

野人喋々說三叉。無賴春風散早花。留得艷名

千歲在。紅雲山下訪生家。高尾碑

雲煙遮麓嶽浮空。身與神仙栖處同。浴後倚欄

閒喚酒。一林早已醉霜楓。

醉步滿跚尋舊跡。山靈欺我導崖鬼。太郎沈沒
知何處。只有幽禽叫暮哀。

角殿山頭坐小臺。欲看名景首頻回。紅雲江樹
幾千疊。疑是燭龍吹燄來。

玉笛吹翻鐵拐巔。落梅一曲久喧傳。誰知獨愛
天然瑟。篋水清邊逃坐禪。妙雲寺

霜樹萬楓映朝暉。無婢無奴不錦衣。別有溫泉
迎貴客。恍疑唐帝伴明妃。

群峯迫谷各爭研。綠碎紅沈滿箒川。笑殺平生
空慕水。蝦蟆化石不爲仙。

萬壑千巖別一區。樓々爲客勉歡娛。溫泉浴裏
賞紅葉。如此江山天下無。

弘道館卽事

國是紛紛鎖與開。當年論士似花魁。可憐今日
皆黃土。只有館中千樹梅。

函嶺途上

昨訪仙湖老健身。暗香疎影最相親。今朝又向
深山去。雲雨過邊認美人。
遲日悠悠。出市闌。春風未度古函關。前山煙雨
後山雪。身在寒喧爭鬪間。

伊東客中雜詠

入浴溫泉出日光。山村最適攝生方。春來日々
探佳境。不慕家鄉慕異鄉。

立石磯邊白浪曠。松川橋畔柳眉顰。濛々七日

桃花雨。絲竹聲。霑惱殺人。

小金井觀花

晚櫻千樹錦成圍。無賴春風颭雪飛。白髮紅顏
都一樣。香雲深處著花衣。

春曉卽事

春眠鶯喚醒。欲嗽臨江汲。花影碎將流。不知停
手急。

韭山城懷古

菲山形勢與齊同。却見城中運遂窮。可惜田單
不施策。八州雲霧散威風。

散策

薰風無處不詩情。農徑樵途任杖行。草暖牧童
猶在夢。柳陰時聽一牛鳴。

詠史

脫却朝衣換法衣。白雲深處掩柴扉。春深山谷
經行日。憶否夷齊采蕨薇。

詠櫻

曾留十字表忠臣。花護荒陵泣鬼神。畢竟衆芳
無匹敵。休言疎影暗香春。

七十七自壽

身健今年喜壽迎。子孫能護擅詩情。秋雲寂寞
鎌山月。春雨空濛墨水櫻。醉枕酒樽鋪草睡。醒
扶吟杖傍花行。大川高嶽皆吾有。何築樓臺住
帝京。

巢雲存稿

巢雲存稿終

大正十年七月二日印刷
大正十年七月十二日發行

(非賣品)

編輯者 小 山 溫
東京市小石川區原町十三番地

印刷者 竹 內 喜 太 郎
東京市牛込區櫻町七番地

印刷所 日清印刷株式會社
東京市牛込區櫻町七番地

11
474

東洋書院藏書

終

